

Kwa taɲa zliya tsasli Pəl kaa ka Tesalənikə Kwəma dza ghwəmməə gha sənataa dzəkən zliya na

Ghala pətsa tsasli Pəl zliya nay, ghəci mbə məlmə Kwərintə na, mbə wə kwa baka wə ci. Kaa mbəzliy nəw Yesəw mbə məlmə Tesalənikə, tə hidī ka Masedəwan, ndəkwə ndəkwə lə məlmə Filipə tsasli na zliya na. Kwataɲay a Pəl niy ghərahwə sləni mbə məlmə Tesalənikə va. Mba'a niy gəzanshi Yəwən kwəma wəzə na kaa mbəzli mbəba, mba'a ghəshi mənishi ka mbəzliy nəw Yesəw Kəristəw ki. Ma ləy hwəm ki na, dza *ka Zhəwifə mbə məlmə va ka hərhə va Pəl, mba'a ghəshi təhamti ki. A ghwəy dzaa kəsay nəwər tsa va mbə zliya ka kwal Yesəw vəh 17:1-14. Ma na Pəl naci kiy, niy kərətə zəzə kwəma ciy dzəkən mbəzliy nəw Kəristəw mbə məlmə vaw. Va tsəgha ghwənay na Timəte ta dza ta kəətishi. Ma sa zhəghəkəvay Timəte na, mba'a gəzanci kaa Pəl dzəkən nzəy tsa mbəzli va. Kala shiy səəti məhərli shi tifa ya tsəgha sahəwə ghəshi ngəra'wə. Sa favə Pəl kiy, ma tsaslanaghəshi na zliya na ki.

Avanay njasa nəwva kwəma mbə zliya na:

Vəh 1 pa' tə vəh 3 Pəl mbə fal mbəzliy nəw Yesəw mbə məlmə Tesalənikə sa garəshi ghəshi jarjar kwa kwal Hyala, ya tsəgha na

ghēshi mbē sa ngēra'wē. Mba'a gēzanshi dība njasa mawti na dza ta kwōmay li shi.

Vēh 4:1-12 Pēl mētsahanshi bērci kaa ka Tesalōnikē nza ghēshi dza kwa kwōma kwa kwōma lē nēw kwal tsa shi va wēzē. Nza ghēshi nzēy shi wēzē fā.

Vēh 4:13 pa' tē vēh 5:1-11 Pēl gēzanshiy dzēkēn sēkē tsa Yesēw ta bāsē mbēzli ci.

Vēh 5:12-28 Kwa kērni gēzē kwōma Pēl, mba'a sēkwē ka Tesalōnikē.

Sēkwēpē

¹ Yēn yēn Pēl, mba'a Shilasē, mba'a Timōte, tsasli na zliya na, kaa mbēzliy nēw Yesēw *Kēristēw mbē mēlmē Tesalōnikē. Sēkwē sēkwēwēy ghēy ghwēy mbēzli Didi Hyala, lē shi Ndē slēkēpē Yesēw Kēristēw. Mēntēwēy wēzē hwēr tsa nzē Hyala, mba'a ndanwēy zērkē mbē nzēy tsa ghwēy!

Njasa nza nzēy tsa ka Tesalōnikē lē njasa banavē ghēshi nefēr shi kaa Yesēw

² Ya hwēmfa cē'wē ghēy Hyalay, mbē cē'wē ka ghēy nza tē ghwēy kwērakwē. War mbē mananta 'wēsa ka ghēy nza ta kwōma ghwēy gwananwēy. ³ Tsēhējēy ma ghēy kwa kwōma dēmme Hyalay, war mbē zēzē ka ghēy nzaa dzēkēn slēni wēzē na ghēra ghwēy tē sa banavē ghwēy nefēr ghwēy kaa Hyala, lē dzēkēn jihē tsa jihēva ghwēy ta slēni va, sa dī ghwēy Yesēw Kēristēw, zhini ka zēzē dzēkēn fē tsa fēy

1:1 1:1 Shilasē: 2Kwēr 1:19; 2Tes 1:1; 1Pi 5:12; Timōte: 1Kwēr 4:17; Tesalōnikē: SlēniKY 17:1 **1:2** 1:2-3 2:13; Flp 1:3; Kwēr 1:3; 2Tes 1:3; 2:13 **1:3** 1:3 5:1-2

ghwəy ghən tsa ghwəy gəzliŋə tərənŋw ta Ndə sləkəmmə Yesəw Kəristəw. ⁴ Ghwəy ghwəy mbəzli diti Hyala niy ngwarməhinəyəy, a ghəy sənay Hyala təravənŋwəy na ta mbə ghwəy nza ka mbəzli nzə. ⁵ Ghala pətsaa gəzanŋwəy ghəy va Yəwən kwəma wəzə nay, niy mənta na nja kwəma ka ndə vaa gəzə lə miy gwa'a tsəghaw, lə bərcki mbə, ka ghəra sləni *Safə tsa Hyala mbə ghəy niy gəzə ghəy kwəma, mba'a ghəy niy sənay wəzə wəzə, kwəma katanŋ na sa gəzə ghəy va, pə ghəy. A ghwəy sənay ya nzəy tsa ghəy njasa niy nzana, ghala pətsaa nza ghəy mbə ghwəy, ta mbəə kəətinŋwəy niy nzəy ghəy gəla nzəy tsa va.

⁶ Sa dza ghwəy kiy, mba'a ghwəy nəwvə səəbə ghəy, lə sa Ntsaa sləkəmmə. Ghala pətsaa zləbavə ghwəy kwəma Hyalay, tərənŋw niy sahəw ghwəy ngəra'wə. Ya tsəgha nzə kiy, a Safə tsa Hyala dəwdəw tsa niy ndanŋwəy vəshi dalala ta kwəma va. ⁷ Mbə kwəma va tsəgha kiy, mba'a ghwəy məninŋwəy ka mbəzliy ci kwal tsa wəzə tsa kaa mbəzliy nəw Yesəw tə hidī ka Masedəwan lə shi ka Akay gwa'a. ⁸ Ava war tə mbərkə kwəma ghwəy pəlivərivata kwəma Ntsaa sləkəmməə dzəmbə mbəzli danŋ. Kwataka tə hidī ka Masedəwan lə ni ka Akay na gwa'a tsəghaw. Ya pa' kwəmabay, a mbəzli favə njasa banavə ghwəy nefer ghwəy kaa Hyala. Sa nzana gwa'a mbəzli favə kwəma va kiy, nahwəti kwəma tifa ghwəla gar zhini ghəy

1:4 1:4 2Tes 2:13, 16 **1:5** 1:5 1Kwər 4:20 **1:6** 1:6 SləniKY
17:5-9; 2Kwər 6:10; 2Tes 3:7, 9 **1:8** 1:8 Rm 1:8

mətsahanshiw. ⁹ Ghəshi də'wə ghən tsa shi ka naa sla kwəma ghwəy. Ka gəzə njasaa niy ka'wətənjəy ghwəy ghala pətsaa nza ghəy mbə məlmə ghwəy, ka gəzə njasa zlay ghwəy kwəma ta mbəreketi mba'a ghwəy zhəghanavə nefer ghwəy kaa Hyala, ka ghəranta sləni ghənzə Hyala katanj na, kwa bəpə piy. ¹⁰ Sa zlay ghwəy ta mbəriy, dzəghwa ghwəy ka ndəghə zhəkə tsa Zəghwə nzə va dzaa səəkə mə ghwəmə. Zəghwə nzə vay, ghəci na Yesəw tsa zhanakati Hyala va mbə məti. Ghəci mbəlantəmmə na va *kwəma jikir na, nəghətaa Hyala dzaa bə nəfəə dzəkən ghwəmmə ghala ngwəvəə dza vaa səəkə.

2

Njasa ghərati Pəl sləni Hyala mbə məlmə Tesalēnikə

¹ A ngwarməhinəy, ya ghwəy də'wə ghən tsa ghwəyəy, a ghwəy sənay, tsəhə tsa ghəy va mbə ghwəyəy, gəməy niy nza naw, pə ghwəy. ² A ghwəy sənay, madfi ghəy tsəhə mbə ghwəyəy, a ghəy sahwə ngəra'wə mbə məlmə ka Filipə, ka tsəərəhwənjəy məndi. Saa tsəhənjəy ghəy mbə ghwəyəy, war ghwəlashi niy nza ka di ma kwəma ghəy danj. Dzəghwa Hyala mba'a fambənjəy bərcki mbə nefer ghəy, mba'a ghəy gəzanwəy kwəma nzə wəzə na ya war mbə ngəra'wə tsa va ghəy tsəgha ki. ³ A na kwəma gəzə ghəy kaa mbəzliy, dzərvə dzar mbəw, kwəma gəmgəm na mbə nəfə tsa ghəy mbə gəzə

1:9 1:9 Zhj 17:3; SləniKY 14:15 **1:10** 1:10 5:1-2, 9; Rm 5:9

2:1 2:1 1:5, 9 **2:2** 2:2 SləniKY 16:19-24; 17:1-9 **2:3** 2:3

2Kwər 4:2

nzəw, ndə tifa ghəy ngədi liw. ⁴ Na na ghəyəy, kwəma gəzanjəy Hyala na sa gəzanshi ghəy kaa mbəzli. Kwəmaa dzaa təbanshi kaa ke ngəriy gəzə ghəyəw, kwəmaa dzaa təbanta kaa Hyala, ghənzə saa sənashi nefer ghəy na sa gəzə ghəy. Sa nzana mba'a ghənzə nanjəy mək gar gəzə kwəma nzə. Va tsəgha fambənəy na gəzə Yəwən kwəma wəzə na va mbə dəvə ghəy.

⁵ A ghwəy sənay, na na ghəyəy, səkə ghəy fəyŋwəy ghani ta gəzanjwəy kwəmaa dzaa təbanjwəyəw, səkə ghəy mənəhwə kwəma ta kwəmavə shi mbə dəvə ghwəyəw. Ava Hyalaa favə, ghənzə dza naa ndəgha fəti tə ghəy!

⁶ Səkə ghəy pəlahwə dikə, a məndi fəə dzəti ghəy, pə ghəy mbə kwəma ghəy, ya va nihwəti mbəzliw. ⁷ A na nava ghəy kəə di nzay, a ghəy ni mbəzli dikə dikə ni nza ghəy, pə ghəy. Sa nzanay, *ka kwal Yesəw nza ghəy. Ya tsəgha nzə kiy, di nava kwəma ghəyəw. Ə na naa zhini ghəy məninjəy ka mbəzliy njədi ma kwəma, ka mənə kwəma lə ghwəy njasa ka məmə kwa ndərazhi vaa mənə lə ndərazhi nzə.

⁸ Kwəma gaga səkə ghəy mbə diŋwəyəw. Tə mbərkə di tsa vay, kwataka yəwən kwəma Hyala va wəzə na na saa di ghəy gəzanjwəy gwa'a tsəghaw, lə piy tsa ghəyəy gwa'a niy di ghəy ndanjwəy, sa nzanay, tərənənəy mawti ghəy kwəma ghwəy.

⁹ A ngwarməhinəy, a ghwəy niy nay, ghəy mbə gəzanjwəy yəwən kwəma Hyala va wəzə nay, tərənəw niy irəhwəvanəy ghəy havəghwə

2:4 2:4 Zher 11:20; 1Tim 1:11; Gal 1:10; Ef 3:2 **2:5** 2:5 2:10;
SləniKY 20:33; 2Kwər 1:23 **2:6** 2:6 Zhŋ 5:41, 44 **2:9** 2:9 2Tes
3:7-9; SləniKY 18:3

lə həvir lə sləni, ta shi zəməə dzəghwa hwər ghəy, vantaa ghəy dzaa fakəññwəy ngəra'wə tsaa pəlanəy shi zəmə. ¹⁰ Ghala pətsaa nza ghəy mbə ghwəy ghwəy mbəzliy banavə nefer ghwəy va kaa Yesəwəy kwəma wəzə na niy məni ghəy, ka nəw kwəma lə kwal tsa nzə, niy nza kwəma tifa gar ndanəy fəti məndi mbəw. Ghwəy də'wə ghən tsa ghwəy dza naa ndəghamti fətiy dzəkən ghəy, mba'a Hyala də'wə ghən tsa nzə kwərakwə fa. ¹¹ Ya ghwəyñwəyshi na, a ghwəy sənay njasa niy məni ghəy lə ghwəy gwanəñwəy kwərakwə, war njasa ka didi vaa kəəti ndərazhi ci. ¹² War ə niy cinwəy ghəy kwəma ka ghwəy məni kwa kwal Hyala, ka mətəhəñwəy bərci, ka pəla kwal tsaa kəətinwəy ta mbə ghwəy nəw kwal Hyala njasa dī na. Hyala va harəñwəy na ta nza ghwəy li mbə shəndəkə tsa nzə tə pətsa sləkə na.

¹³ Zhini bay, zlay məni 'wəsa ghəy kaa Hyala dibaw. Sa wanay, sa nzana ghala pətsaa tsəhəñəy ghəy va mbə ghwəy ta gəzanwəy kwəma Hyalay, a ghwəy niy fa kwəma va, mba'a ghwəy niy zləbavə mbə nefer ghwəy ka sənay kwəma Hyalaa sava katanə, kwəmaa səkə va ndə ngəri naw, pə ghwəy. Ta na navay, kwəmaa səkə va Hyala na. Ghənzə na saa ghəra sləni va mbə ghwəy lə bəliti, ghwəy ghwəy mbəzliy banavə nefer ghwəy va kaa Yesəw *Kəristəw.

¹⁴ Ghwəy kiy ngwərməhinəyəy, kwəmaa kəsashi nihwəti mbəzli Hyala va banavə ne-

2:10 2:10 2:5 **2:11** 2:11 SləniKY 20:31 **2:12** 2:12 4:1; Rm 5:2; Flp 1:27 **2:13** 2:13 1:2-3; Gal 1:11-12 **2:14** 2:14 SləniKY 17:5

fer shi kaa Yesəw tē hidī ka Zhəwde na saa kəsaŋwəy va. Njasaa niy sanamiyshi *ka Zhəwifə va ngəra'wəy, tsəgha samiyŋwəy mbəzli tē hidī ghwəy ngəra'wə kwərakwə. ¹⁵ Ka Zhəwifə vay, ghəshi bakwamti na ka gəzə kwəma Hyala niy nza, zhini mbəh ghəshi pəəsliti Yesəw Ndə sləkəmmə. Ge'i lə tsa ghəy tsa vəghwə dība kiy, a ghəshi samiyŋəy ngəra'wə kwərakwə. Ka mənī kwəmaa təbanta kaa Hyala ghəshi ya jəwəw. Ka jaka mbəzli gwa'a gwa'a mənishi ghəshi. ¹⁶ Makəə makəŋəy ghəshi va gəzanshi kwəma Hyalaa mbəlitishi kaa *mbəzliy kamaa ka Zhəwifə. Mbə kwəma mənī ghəshi va tsəghay, ə kərkamti ghəshi mənī kwəma shi jikir na, dzəghwa Hyala mba'a bəti nəfəə dzəkən shi lə ngwəvə nzə.

Nzəy tsa ka Tesalēnikə dəpanati nəfə tsa Pəl

¹⁷ A na na ghəy na ghəy kiy ngwarməhiray, ya tsəgha kama ghəy mbə ghwəy lə vəgha ghəy nanay, war mbə zəzə nza ghəy dzəkən ghwəy. Tərəŋw səəkə ghəy mbə pəla zha ta kwəmay lə ghwəy, sa nzanay, ləy hwəm saa bərvanəy ghəy va mbə ghwəy ta vəghwə jəwəy, lə dī zhəghəvaa zhəmbə ghwəy niy nza ghəy. ¹⁸ Va tsəgha niy dī ghəy tsəhəŋəy mbə ghwəy. Yən də'wə ghən tsee yən Pələy, dāŋ sədēe səəkee mbə pəla kwal tsa zha ta nighəŋwəy, dzəghwa mba'a *ndə jaka tsa Hyala makəhwə kwal va ghəy. ¹⁹ Ta na navay, gar maw kwəmə nza ghəy

2:15 2:15 SlēniKY 2:23; 9:23, 29; 13:45, 50; 14:2, 5, 19; 17:5, 13; Rm 11:28; 2Kwər 11:23-29 **2:16** 2:16 Mt 23:31-33 **2:17** 2:17 3:10 **2:19** 2:19-20 1Kwər 9:24-25; Flp 4:1; 2Tes 1:4

lə ghwəy, sa nzanay, mbəzli Hyala nza ghwəy, kwataka tə mbərkə nihwəti mbəzli Hyala fəy ghəy ghən tsa ghəy gəzlinə ta zhəmə Hyalaw, lə ghwəy ta na kwərakwə. Ghwəy bəŋəy na vəshiy dzəmbə nefer ghəy, tə ghwəy sənay məndi, a ghəy ghərati sləni wəzə na, kə məndi. Lə kwəma ghwəy dza ghəy vəshi kwa kwəma Ndə sləkəmmə Yesəw fəca dza naa zhəghəvaa zhəkə. ²⁰ Tsəgha na nava katan, ghwəy na ni ghəy mbəzli mənishi sli'i ghəy pay ti shi, lə vəshi nza ghəy mbə nefer ghəy tə mbərkə ghwəy.

3

¹⁻² Ma sa nzana mba'a ghəy hyayvanəy, kala səkə ghəy favə gaka ghwəy ki na, dza ghəy mba'a ghəy təkəti: «Wəzəba dza ghwəm ghwənanaghəshi Timəte na, mba'a ghwəm nzəyəm kwətim mbə məlmə Aten» pə ghəy. Dzəghwa ghəy tsəgha ki, mba'a ghəy ghwənəghəŋwəy Timəte. Ghəci kiy, a ghwəy sənay zəməmmə na. Ntsa ghəra ghəy sləni Hyala li jakəjakə, ta gəzə kwəma *Kəristəw wəzə na kaa mbəzli na. Ma kwəma ghwənəghəŋwəy ghəy Timəte tiy, ta mbə ghəciy mətəsavəŋwəy bərqi, lə ta mbə ghəciy kətitəŋwəy nza ghwəy mbəə garəŋwəy jarjar tə kwəma Hyala banavə ghwəy va nefer ghwəy. ³ Vantaa ndə ya kwətiŋ mbə ghwəy dzaa hwəy zlata kwəma Hyala, va ngəra'wə tsa saŋwəy məndi va. Na navay, a ghwəy sənay ngəra'wə tsa tsəgha tsa vay, nahwəti bəla mbə

3:1-2 3:1 SləniKY 17:15 **3:1-2** 3:2 Tim: 1:1 **3:3** 3:3 Ef 3:13;
2Tes 1:4; 2Tim 3:12

nzøy tsa ghwəmmə na ghwəmmə mbəzli Hyala.
⁴ Ghala pətsaa nza ghəy va mbə ghwəyəy, a ghəy niy gəzamtəŋwəy ta sammə ngəra'wəə dza məndi, pə ghəy niy ni. Ghəci na sa kən ghwəy tsa sana njasa niy sənay ghwəy va. ⁵ Va tsəgha nzana, sa sənay ya mbə sa ngəra'wə tsa va niy nza ghwəy pənəy, kala mbayee zhiniy sə'wati nava kwəma. Dzəghwee ki, bəŋ yən ghwənəghə Timəte kaa ngəŋwəy, a ghəci dzaa nighətəŋwəy, ta mbee sənay nda garəŋwəy ghwəy jarjar tə bə tsa banavə ghwəy va nefer ghwəy kaa Yesəw. Sa nzanay, mbə dza niy nza heree va nəghətaa *ndə jaka tsa Hyala dzaa həərəhwəŋwəy, mba'a ghwəy zlata nəw kwəma Yesəw. Ka gha nighə ki na, givə gəmta sləni ghərati ghəy va mbə ghwəy taa nza.

⁶ Dzəghwa ndəs Timəte zhəkəy sana ki, sa səkə na mbə ghwəy, dza na mba'a slakəŋəy kwəma nzøy tsa ghwəy njasa nza na. A ghwəy banavə nefer ghwəy kaa Yesəw gwanashi, mbə dīva nza ghwəy kwa jipə ghwəy, kə. Ma kə ba na: War kən ghəy ka zəzə kwəma ghwəy nza ya hwəmba, tərəŋw dī ghwəy zhiniy kwəmay lə ghəy kwərakwə, njasa nza ghəy va war mbə dī zhiniy kwəmay lə ghwəy, kə. ⁷ Ya tsəgha nza ghəy mbə sa ngəra'wə tərəŋw kiy ngwarməhinəyəy, war sa səkə Timəte gəzanəy kwəma nzøy tsa ghwəy njasa banavə ghwəy nefer ghwəy gwanashi kaa Yesəwəy, mba'a ghəy kwəmavə bərcki mbə nefer ghəy. ⁸ Nana kiy, a

3:4 3:4 SləniKY 14:22 **3:5** 3:5 Flp 2:16 **3:6** 3:6 SləniKY 18:5; 2Tes 1:3; 1Tim 1:5; Flm 5-7; Gal 5:6 **3:7** 3:7 2Tes 1:4

her ghəy zhəghwashi sa nzana, mba'a ghwəy garəŋwəy jarjar mbə jakəva tsa ghwəy lə Ndə sləkəpə. ⁹ Sənay ghəy njasa dza ghəy məni tsava 'wəsa kaa Hyala ta vəshi ndanəy ghwəy naa dzəmbə nefer ghəyəw. ¹⁰ Havəghwə lə həvir nza ghəy mbə cə'wə Hyala tərəŋw tərəŋw a ghənzə ndanəy kwal ta mbə ghwəmmə zhiniy nay ghən tsa ghwəmmə, zhini mba'a ghəy banavəŋwəy nihwəti shi sənashi ma ghwəy kwa kwal Hyala.

¹¹ Ə cə'wə ghəy dəmmə Hyala də'wə ghən tsa nzə, ghəshi lə Ndə sləkəmmə Yesəw, a ghəshi gwəmantəŋəy kwal tsaa tsəhə mbə ghwəy. ¹² Ə cə'wə ghəy Ndə sləkəmmə a ghəci mətəhəti kəli dī tsa dī ghwəy va ghən tsa ghwəy tərəŋw dalala, lə dī tsa dī ghwəy va nihwəti mbəzli dība, nza dī tsa ghwəy nza yəmyəm lə dī tsa va ghəy tə ghwəy kwərakwə. ¹³ Ma ghalaba kiy, ta fambəŋwəy bərzi dza Ndə sləkəmmə mbə nefer ghwəy, ta mbə ghwəy nza dəwdew kala fəti dzar kwa kabaka ghwəy kwa kwəma Dəmmə Hyala fəca dza Yesəw Ntsaa sləkəmmə zhəghəvaa zhəkə ghəshi lə mbəzli ci.

4

Naa təbanta kwəma kaa Hyala

¹ Naa tərmbə nana kiy ngwarməhinəyəy, a ghəy niy banavəŋwəy njasa təbə na mbəzliy nəw Yesəw məni ta təbanta kaa Hyala. Dzəghwa tsəgha ghwəy məni sənzenva. Sana kiy, a

cə'wəŋwəy ghəy tərəŋw lə slən tsa Yesəw Ntsaa sləkəmmə, mətsehəm mēni kwəma va tsəgha. ² Kwəmaa gəzanəy Ndə sləkəpə Yesəw va, mba'a ghəy banavəŋwəyəy, a ghwəy sənata. ³ Ma kwəma di Hyalay, mba'a ghwəy mənīwəy dēwdew, Ka ndəghwə ghən tsa ghwəy va mēni njəfa. ⁴ Ya wa ndə mbə ghwəyəy, sənay tə ghəci kəsə ghən tsa ci mbə nzəy tsa ci dēwdew lə bama ti. ⁵ Əntaa ghwəy zlay ndərshiy tsa ghwəy mbahəŋwəy dzəmbə kwəmaa təbə ma nja mbəzliy nəw ma Hyala ma. ⁶ Əntaa ndə ya tsamaba ci mbə ghwəy dzaa mananci *kwəma jikir na kaa tsahwəti zəmbəghəy tsa mbə nəw Yesəw, ya ka sla mətse ta mali ci, ya ka gwəfə shi ci ma. A ghəy niy gəzanəwəy kwəma va wəzə wəzə ghala kwatanata, ma gəla mbəzliy məməni shi tsəgha ni vay, ta basanshi ngwəvə dza Ndə sləkəpə, pə ghəy niy ni. ⁷ Ta na navay, ta nza ghwəmmə ka mbəzliy məməni njəfa harvəmmə Hyalaw, ta nza ghwəmmə ka mbəzli dēwdew ni harvəmmə na. ⁸ Ava va tsəgha nzana ki, ya wa ntsaa zləba ma kwəma vay, nəghətaa ghəci ni kwəma ndə ngəriy zləba mee kə ma. Kwəma Hyala na sa zləba ma na, ghənzə saa ndaŋwəy Safə tsa nzə va dēwdew tsa.

⁹ A na kwəma dīva kwa jipə ghwəy, ghwəy ng-warməmə mbə nəw Yesəwəy, ya kala tsasliŋwəy kwəmee dzəkən nava kwəmay, kwəma tibaw. Sa nzanay, a Hyala də'wə ghən tsa nzə banavəŋwəy dīva kwa jipə ghwəy njasa təbə

4:3 4:3 5:23; 1Kwər 6:13; Ebr 10:10 **4:7** 4:7 4:3; 1Pi 1:15-16

4:8 4:8 1Kwər 6:19-20 **4:9** 4:9 Zher 31:33-34; Gal 6:10; Ef 5:2

na. ¹⁰ Ava ghēnzə na kwəma mēni ghwəy sana kaa ngwarməhim mbə nəw Yesəw tə hidi ka Masedəwan gwanashi, ə cə'wəŋwəy ghəy, a ghwəy zhiniy mətsəhə dza kwa kwəma kwa kwəma lə dī tsa va. ¹¹ Ə pə ghwəy jihəva, ta mbə nzəy tsa ghwəy nza lə zərkə mbə. Ya wa ndəy, ə kəə nighəə dzəkən ni ci shiy, ka mēni slēni də'wə ghən tsa ci ta təhə ghəzli kən ghən ci. Njasa niy gəzanwəy ghəy va ghala kwatanata. ¹² Mba'a pə ghwəy mēni tsəghay, war ta fal kwəma ghwəy dza mbəzliy nəw ma Yesəw dza tərəŋw! Ya nimaba shiy ghalaba kiy, ka dza ghwəy ghishi gar dza ghwəy ta cə'wəw.

Gəzə kwəmaa dzəkən mbəzliy nəw Yesəw bəkwəshi, lə dzəkən zhəkə tsa Ndə sləkəpə

¹³ A ngwarməhiŋəy, ka dī ghəy ghwəy kala sənata kwəmaa dzəkən mbəzliy bəkwəshiw. Əntaa ghwəy taa nza cəlikwə, nja mbəzliy fəy ma ghən tsa shi gəzliŋə ta zhakati mbə məti. ¹⁴ Ghwəmmə kiy, a ghwəmmə sənay a Yesəw mətīy, mba'a Hyala zhanakati mbə məti pə ghwəmmə. Njana nzana tsəghay, kwəma tifa ka səmməw, a ghwəmmə sənay, mbəzliy banavə nefer shi ka Yesəw, mba'a ghəshi bəkwəshiy, ta zhanakatishi dza Hyalaa dza, ta nzəy lə Yesəw, pə ghwəmmə.

¹⁵ Ma kwəma dza ghəy na ta gəzə sanay, kwəma gəzəkə Ntsaa sləkəmmə Yesəw lə miy

4:10 4:10 2Tes 3:4 **4:11** 4:11 2:9; Ef 4:28; 2Tes 3:10, 12
4:12 4:12 1Kwər 5:12-13; Kwəl 4:5 **4:13** 4:13-17 5:1-2; 1Kwər 15:51-52 **4:13** 4:13 1Kwər 15:18-19; Ef 2:12 **4:14** 4:14 Rm 14:9; 1Kwər 15:3-4, 12, 20 **4:15** 4:15 1Kwər 7:10, 25

tša ci na, ghwəmmə ghwəmmə mbəzliy dzaa nza tə ghwəməmmə fəca dza Ndə sləkəmmə Yesəw zhəghəvaa zhəkəy, ka dza ghwəmmə dzammə dzəvəgha Yesəw pərba ghwəmmə kaa mbəzliy bəkwəshiw. ¹⁶ Fəcavay, ta gəzəkəvəri kwəma dza Hyalaa dza ta gha məniva shiy, ka mazə tša ka kwal Hyala dzay, mba'a ngwəmata lala, ka məndi fa ki na, viy təlīmə Hyalaa gaka, ka məndi nighə ki na, Ndə sləkəmmə Yesəw mbə səkwa səkə mə ghwəmə. Ma mbəzliy niy yivə kwəma Yesəw niy bəkwəshi kiy, pərba ghəshi dza naa zhakatishi mbə mēti. ¹⁷ Ləy hwəm ki na, nza Hyala kafammə ghwəmmə niy tərmbə ləməcimmə mbəzli, ta dzaa jakəva məba tə ghwəmə mbə kwələbi li shi, ta mbə ghwəmmə madi gwanammə ta kwəmə lə Ndə sləkəmmə Yesəw mbə safə tsəgha ki. Ma nza ghwəmmə nza gwanammə vəgha Ndə sləkəmmə Yesəw, ya pa' hwəmba ki. ¹⁸ Ghənzə tsəgha kiy, ə pə ghwəy dəpə ghən tša ghwəy kwa jipə ghwəy lə kwəma va.

5

Tsakətəvanjwəyəm wəzə

¹ A ngwərməhinjəy, a na vəghwə tša dza shi vaa məniva ti lə vici va gwa'ay, ya kala tsaslinjwəy kwəma ghəy dzəkən na, kwəma tifaw. ² Sa nzanay, ya ghwəynjwəyshi na a ghwəy sənay njasa ka ndə ghəli vaa səkə

4:16 4:16 1Kwər 15:23 **4:17** 4:17 Zhj 12:26; Rm 5:17; Flp 3:20

5:2 5:2 1:2-3, 10; 2:19; 3:13; 5:23; Mt 24:36; Flp 4:5; 2Tes 1:7, 10; 2:1-2; nja ndə ghəli: Mt 24:43; 2Pi 3:10; ShiZhj 3:3; 16:15

vətəghə həvir dza vici Ndə sləkəmməə səkə.
³ Ghala pətsa dza mbəzliy ni, kay, a wahə tība nana, kwəma tībaa gagapəw kə ghəshiy, war vətəghə dza ngəra'wəə səkəy dzəkən shi. Njasa ka ya vaa ghavəə kafəta ta mali lə hwər vətəghə. Ka dza kwal nza va ndə gar zhini ghəciy mbəliy ghwəla kiw! ⁴ Ghwəy, na na ghwəy kiy ngwarməhinjəyəy, mbəzli mbə kwəsli nza ghwəyəw, əntaa kwəma va dzaa ngalitəjwəy vətəghə, njasa ka ndə ghəli vaa ngaliti mbəzli ma. ⁵ Ghwəy gwanəjwəy na na ghwəyəy, mbəzli mbə wəj pi nza ghwəy, mbəzliy mənī kwəma havəghwə. Mbəzli ka mənī kwəma həvir dzar mbə kwəsli nza ghwəmməw. ⁶ Njana nzana tsəgha kiy, na na ghwəmmə na, ka hi ghwəmmə nja nihwəti mbəzli gwanashi ni ma. Tsəmtsəmmə pə ghwəmmə nzəyəmmə, ka ya ghən tsa ghwəmmə va shi tə hidī. ⁷ Sa nzanay, həvir ka mənidiy hi, ntsaa sahwə shiyəy, həvir ka naa ghi! ⁸ Na na ghwəmməy, mbəzli mbə wəj pi nza ghwəmmə, ə pə ghwəmməə ya ghən tsa ghwəmmə va shi tə hidī. Ə pə ghwəmmə banavə nefer ghwəmmə kaa Yesəw, ka dī nihwəti mbəzli ka məjə'a tsa ghwəmmə kwəban tsahi tsa pakən ghwəmmə ta mbəz. Zhini mba'a ghwəmmə fəy ghən tsa ghwəmmə gəzlinə ta vici dza Hyalaa mbəlimmə ti ka məjə'a tsa ghwəmmə daghwəba tsahi tsa pambə ghwəmmə mbə ghən ghwəmmə ta mbəz. ⁹ Ta na navay ta sammə ngəra'wə

5:3 5:3 Zher 6:14-15; Mt 24:39 **5:5** 5:5-8 Rm 13:11-12; Ef 5:8-9

5:8 5:8 Ef 6:11-17 **5:9** 5:9 1:10; 2Tes 2:14

təravəmmə Hyalaw, ta mbəlītəmmə tə mbərkə sləni wəzə na ghərati Ndə sləkəmmə Yesəw *Kəristəw təravəmmə na. ¹⁰ Yesəw Kəristəw tsa vay, aa mətīy tə ghwəmmə. Ta mbə ghwəmmə nzəy li tə pətsa kwətīj tsay, fəca dza naa səkə. Ya ghwəmmə bəkwə bəkwə dza naa nza, ya ghwəmmə tə ghwəməmmə tsətsə dza naa nza. ¹¹ Ghənzə tsəgha kiy, ə pə ghwəy mətəsəhə bərći kaa ghən tsa ghwəy kwa jipə ghwəy, ka kəti ghən tsa ghwəy kwa jipə ghwəy, ta kəli kwa kwal Hyala. Njasa nza ghwəy va mbə məni sənzənva.

Kwa kərni gəzə kwəma mba'a səkwpə

¹² A ngwarməhinəy, ə cə'wəŋwəy ghəy, dī pə ghwəy dī fəti va mbəzliy ghəra sləni Hyala mbə ghwəy, mbəzli fəy Ndə sləkəmmə kwa kwəma ghwəy ta bəniŋwəy shiy. ¹³ Ə pə ghwəy ha'wə ti shi tərəŋw, ka dī kwəma shi dalala, ta sləni Hyala ghəra ghəshi kwa jipə ghwəy. Lə zərkə pə ghwəy kwa jipə ghwəy lə mbəzli.

¹⁴ Ə cə'wəŋwəy ghəy dība ngwarməhinəy, ə pə ghwəy gəzə kwəma kaa ka meredem mbə ghwəy, ka mətəhanshi bərći kaa mbəzli nza hazləni mbə nefer shi, kətim mbəzli daw daw bərći ni. Ə pə ghwəy sə'wa kwəma mbəzli gwanashi. ¹⁵ Mənim məhərli wəzə, vantaa ndə mbə ghwəy təkə wa kwəma jikir tsa mananati tsahwəti ndə, lə *kwəma jikir na kwərakwə dība ma. Ya hwəmbəy ə pə ghwəy jihəva ta məni kwəma wəzə na kwa jipə ghwəy, lə kaa nihwəti mbəzli gwanashi ni.

16 Ə pə ghwəy vəshi ya hwəmba! 17 Ka dəkəva ghwəy ta cə'wə Hyala ya hwəmba ma!
 18 War 'wəsa pə ghwəy mananta kaa Hyala ya mbə namaβa kwəmaa məniva gwa'a. Ghənzə na kwəma dī Hyala ghwəy mananta, ghwəy mbəzliy jakəŋwəy lə Yesəw *Kəristəw.

19 Ka makə sləni dī *Safə tsa Hyala dəwdew tsa məni ghwəy ma. 20 Ka ndərə kwəma mbəzliy gəzə kwəmaa səəkə va Hyala ghwəy ma. 21 War nighə pə ghwəy nighə shiy gwanashi. Nza ghwəy təra na wəzə na kwəma mbə shi. 22 Əntaa ghwəy məni ya namaβa hwəlfə *kwəma jikir na ma.

23 Nza Hyalaa βəpə zərkə, məntəŋwəy dəwdew kwa kwəma nzə. Mba'a ndəghwətəŋwəy məhərlihi ghwəy, lə nefer ghwəy, mba'a vəgha ghwəy gwa'a, kala dza rədaa nza tar kabaka ghwəy ya jəw, fəca vici dza Ndə sləkəmmə Yesəw Kəristəw zhəkə. 24 Hyalaa haraŋwəy va ta nza ghwəy ka shi nzəy, ta mənti dza na tsəgha, sa nzanay, ka gəzə kwəma na bakə bakəw.

25 A ngwarməhinəy, cə'wə tə ghwəy Hyala tə ghəy kwərakwə.

26 Səkwətim ngwarməhimmə nəw Yesəw wəzə wəzə.

27 Ə cə'wəŋwəy ya lə slən tsa Ndə sləkəmmə Yesəw, a ghwəy janganshira zliya na kaa ng-

5:16 5:16 Flp 4:4 5:17 5:17 5:25; Lk 18:1; Rm 12:12; Ef 6:18; Kwəl 4:2 5:18 5:18 Ef 5:19-20 5:19 5:19 Ef 4:30 5:21 5:21 1Kwər 14:29; Ef 5:10; 1Zhj 4:1 5:23 5:23 5:1-2; 2Kwər 13:11 5:24 5:24 1Kwər 1:8-9; Flp 1:6; 2Tes 3:3 5:25 5:25 1:2-3; Rm 15:30 5:26 5:26 Rm 16:16 5:27 5:27 Kwəl 4:16

warməhimmə gwanashi. ²⁸ Ava tifa kərayee,
nza ghwəy nza ki. Məntəjwəy wəzə hwər tsa
ci Ndə sləkəmmə Yesəw Kəristəw.

**Zliya Yəwən kwəma wəzə naa dzəkən
Yesəw Kəristəw**

**Bana: Zliya Yəwən kwəma wəzə naa dzəkən Yesəw
Kəristəw New Testament**

Le Nouveau Testament en langue Bana du Cameroun

copyright © 2005 Wycliffe Bible Translators, Inc.

Language: Bana

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

ae014872-94cd-54bc-869e-601bde2245b3